

REGIONAL NEWS UNIT
ALL INDIA RADIO, AGARTALA
Date: 21-03-2024
Time: 07:55-08:05 PM Hrs
BENGALI EVENING BULLETIN

Headlines :

- (১) আসন্ন লোকসভা নির্বাচনে মনোনয়নপত্র গ্রহণের শেষ সময়সীমা পর্যন্ত চূড়ান্ত ভোটার তালিকায় নতুন ভোটারের নাম সংযোজন করা যাবে ।
- (২) আসন্ন লোকসভা নির্বাচনের জন্য ভোট কর্মীদের প্রশিক্ষণ আজ থেকে শুরু হয়েছে ।
- (৩) উপরাষ্ট্রপতি জগদীপ ধনখর জোর দিয়ে বলেছেন যে অর্থনীতি এবং প্রযুক্তিতে ভারতের উত্থান বিশ্ব শান্তি ও সম্প্রীতির ক্ষেত্রে নিশ্চয়তা ।
- (৪) নাগাল্যান্ডে আয়োজিত তৃতীয় উত্তরপূর্ব গেমসে ত্রিপুরাকে প্রথম স্বর্ণপদক এনে দিলো ফাতেমা বেগম ।

Election-Voter list :

আসন্ন লোকসভা নির্বাচনে মনোনয়নপত্র গ্রহণের শেষ সময়সীমা পর্যন্ত চূড়ান্ত ভোটার তালিকায় নতুন ভোটারের নাম সংযোজন করা যাবে। নির্বাচন কমিশনের সচিব পবন দিওয়ান মুখ্য নির্বাচনী আধিকারিকদের কাছে লেখা একটি চিঠিতে একথা উল্লেখ

করেছেন। কমিশনের এই নির্দেশিকা অনুযায়ী রাজ্যে পশ্চিম ত্রিপুরা লোকসভা আসনের নির্বাচনে এবং রামনগর বিধানসভা কেন্দ্রের উপ নির্বাচনে মনোনয়নপত্র দাখিলের শেষ দিন অর্থাৎ আগামী ২৭শে মার্চ পর্যন্ত নতুন ভোটারের নাম চূড়ান্ত ভোটার তালিকায় সংযোজন করা যাবে। এক্ষেত্রে বয়সের ভিত্তি ধরতে হবে চলতি বছরের পয়লা জানুয়ারি। তাছাড়া লোকসভার দ্বিতীয় দফার নির্বাচনে অর্থাৎ পূর্ব ত্রিপুরার লোকসভা আসনের নির্বাচনে মনোনয়নপত্র গ্রহণের শেষ দিন অর্থাৎ চৌঠা এপ্রিল পর্যন্ত চূড়ান্ত ভোটার তালিকায় নতুন ভোটারের নাম সংযোজন করা যাবে। পূর্ব ত্রিপুরার লোকসভা আসনের ক্ষেত্রে ভোটার তালিকায় নাম অন্তর্ভুক্তির জন্য ২৫শে মার্চ পর্যন্ত যারা আবেদন করেছে, একমাত্র সেই আবেদনপত্রগুলো বিবেচনা করা হবে।

Vote Training :

আসন্ন লোকসভা নির্বাচনের জন্য ভোট কর্মীদের প্রশিক্ষণ আজ থেকে শুরু হয়েছে। আগরতলার শিশু বিহার স্কুলে সদর মহকুমার আটটি বিধানসভা কেন্দ্রের জন্য ভোট কর্মীরা প্রশিক্ষণে অংশ নেন। পশ্চিম ত্রিপুরা লোকসভা আসনের রিটার্নিং অফিসার ডা: বিশাল কুমার আজ এখবর জানান।

LS-Candidate :

পশ্চিম ত্রিপুরা লোকসভা আসনে প্রতিদ্বন্দ্বিতার জন্য এস.ইউ.সি.আই(সি) প্রার্থী অরুন কুমার ভৌমিক আজ রিটার্নিং অফিসার ডা: বিশাল কুমারের কাছে মনোনয়নপত্র পেশ করেন।

উল্লেখ্য এই আসনে প্রতিদ্বন্দ্বিতার জন্য গতকাল নির্দল প্রার্থী মিলনপদ মুড়াসিং মনোনয়নপত্র জমা দিয়েছেন।

CM-Sepahijala :

সিপাহীজলা জেলার প্রতিটি বিধানসভা বি.জে.পির ঘর ঘর অভিযান কর্মসূচি চলছে। তারই অঙ্গ হিসেবে আজ পশ্চিম ত্রিপুরা লোকসভা আসনের অন্তর্গত গোলাঘাটি বিধানসভা কেন্দ্রের কাঞ্চনমালা এলাকার কয়েকটি বুথে বাড়ি বাড়ি জনসম্পর্ক করেন বিজেপি নেতা, মুখ্যমন্ত্রী ডক্টর মানিক সাহা। মুখ্যমন্ত্রীর সঙ্গে রাজ্য শিল্প উন্নয়ন নিগমের চেয়ারম্যান নবাদল বণিক, গোলাঘাটি বিধানসভা কেন্দ্রের প্রাক্তন বিধায়ক বীরেন্দ্র কিশোর দেববর্মা, বি.জে.পির সিপাহীজলা জেলা উত্তরাংশের সভাপতি গৌরাঙ্গ ভৌমিক সহ জেলা ও মন্ডল স্তরের নেতৃত্ব উপস্থিত ছিলেন।

মুখ্যমন্ত্রী আজ স্থানীয় বাজার ব্যবসায়ীদের সঙ্গে কথা বলেন এবং দলীয় কার্যালয়ে দলীয় নেতা কর্মীদের সঙ্গে আলোচনায় মিলিত হন।

Election preparatory Meeting :

শান্তিরবাজার মহকুমা শাসকের অফিসে শান্তিরবাজার বিধানসভার ৬টি সেক্টর ও জোলাইবাড়ি বিধানসভা এলাকার ৬টি সেক্টরের সিভিল সেক্টর অফিসার ও পুলিশ সেক্টর অফিসারদের নিয়ে আজ এক সভা অনুষ্ঠিত হয়। পশ্চিম ত্রিপুরা লোকসভা কেন্দ্রের অন্তর্ভুক্ত শান্তিরবাজার বিধানসভা কেন্দ্রের সহকারী রিটার্নিং অফিসার অভেদানন্দ বৈদ্য ও পূর্ব ত্রিপুরা লোকসভা কেন্দ্রের

অন্তর্ভুক্ত জোলাইবাড়ি বিধানসভা কেন্দ্রের সহকারী রিটার্নিং অফিসার দেবজ্যোতি রায় দুই বিধানসভা কেন্দ্রের ভোট গ্রহন কেন্দ্র গুলিতে ভোটারদের জন্য পানীয় জল, শৌচাগার, দিব্যাঙ্গদের বিভিন্ন সুযোগ সুবিধা ও আর্দশ নির্বাচনী বিধিগুলি সঠিকভাবে প্রয়োগ করার বিষয়ে আলোচনায় গুরুত্ব আরোপ করেন।

BJP Campaign :

বিজেপি নেতা তথা পরিবহন মন্ত্রী সুশান্ত চৌধুরীও আজ পশ্চিম ত্রিপুরার লোকসভা আসনে বিজেপি প্রার্থী বিপ্লব কুমার দেবের সমর্থনে রানীরবাজারে প্রচারে অংশ নেন।

এদিকে, আজ জোলাইবাড়ি বিধানসভা কেন্দ্রের কোয়াইফাং বাজারে পূর্ব ত্রিপুরা লোকসভা আসনে বিজেপি প্রার্থী কৃতি সিং দেববর্মার সমর্থনে মিছিল ও সভা অনুষ্ঠিত হয়। সভায় বক্তব্য রাখেন সমবায় মন্ত্রী শুল্লাচরন নোয়াতিয়া।

Road Accident :

উত্তর জেলার চুড়াইবাড়িতে গতকাল গভীর রাতে একটি দ্রুতগামী বাইকের ধাক্কায় নাকা পয়েন্টে কর্তব্যরত টি.এস.আর জওয়ান সান্দনা ডার্লিং-এর মৃত্যু হয়। ধর্মনগরের জেলা হাসপাতাল মর্গে আজ ময়নাতদন্তের পর ধর্মনগরের বৈঠাংবাড়িতে মৃত জওয়ানের শেষ কৃত্য সম্পন্ন হয়।

LEADER OPPOSITION :

সিপিআই এম-এর উদ্যোগে আজ পানিসাগরে এক হলসভা অনুষ্ঠিত হয়। এই হলসভায় বক্তব্য রাখেন বিরোধী দলনেতা জিতেন্দ্র চৌধুরি, সিপিআইএম রাজ্য সম্পাদক মন্ডলীর সদস্য পবিত্র কর, উত্তর জেলা সম্পাদক অমিতাভ দত্ত প্রমুখ।

Vice president :

উপরাষ্ট্রপতি জগদীপ ধনখর জোর দিয়ে বলেছেন যে অর্থনীতি এবং প্রযুক্তিতে ভারতের উত্থান বিশ্ব শান্তি ও সম্প্রীতির ক্ষেত্রে নিশ্চয়তা। তিনি আরও বলেন যে ভারত বিশ্বব্যাপী শান্তি, স্থিতিশীলতা এবং সম্প্রীতি লালন ও সুস্থায়ী করতে সমমনা দেশগুলিকে জড়িত করতে প্রতিশ্রুতিবদ্ধ। আজ নতুনদিল্লির উপ-রাষ্ট্রপতি নিবাসে ইন্টারন্যাশনাল স্ট্র্যাটেজিক এনগেজমেন্ট প্রোগ্রামের উদ্বোধনী অংশগ্রহণকারীদের সঙ্গে মতবিনিময়কালে শ্রী ধনখর এই কথা বলেন।

ECI :

নির্বাচন কমিশন ইলেকট্রনিক্স এবং আইটি মন্ত্রককে অবিলম্বে হোয়াটসঅ্যাপে বিকশিত ভারত বিষয়ে, মেসেজিং বা বার্তা সরবরাহ বন্ধ করার নির্দেশ দিয়েছে। কমিশন জানিয়েছে, সাধারণ নির্বাচন ঘোষণার পরও নাগরিকদের ফোনে এ ধরনের বার্তা পাঠানো হচ্ছে বলে বেশ কিছু অভিযোগ পাওয়া যাচ্ছে। জবাবে, মন্ত্রক কমিশনকে জানিয়েছে যে যদিও আদর্শ নির্বাচনী আচরণ বিধি কার্যকর হওয়ার আগেই চিঠিগুলি পাঠানো হয়েছিল, তবে

সেগুলির মধ্যে কিছু সম্ভবতঃ কোন ব্যবস্থা গত সমস্যা এবং নেটওয়ার্ক সীমাবদ্ধতার কারণে বিলম্বে প্রাপকদের কাছে পৌঁছেছে।

ECI, wrong information :

নির্বাচন কমিশন সাধারণ নির্বাচনকে ঘিরে ভুল তথ্যের চ্যালেঞ্জ মোকাবেলায় প্রস্তুত রয়েছে। এই বিষয়ে কমিশন কঠোর নির্দেশ জারি করেছে এবং সকল অংশীদারদের সতর্কতা ও দায়িত্ব পালনের আহ্বান জানিয়েছে। কমিশন রাজনৈতিক দলগুলিকে কোনও তথ্য সম্প্রচারের আগে যাচাই করার অনুরোধ করেছে।

বিত্রান্তিকর বিষয়বস্তুর প্রচার রোধ করার জন্য নির্বাচন কমিশন সব রাজনৈতিক দলকে সামাজিক মাধ্যমে দায়িত্বশীল থাকার আহ্বান জানিয়েছে।

Sanskriti Baloy :

বাংলা সংস্কৃতি বলয়ের উদ্যোগে আগামী ২৪শে মার্চ, রবিবার নন্দননগর সেনপাড়া মাঠে সাপ্তাহিক সংস্কৃতি হাটে অনুষ্ঠিত হবে বসন্ত উৎসব। এই উৎসবে প্রধান অতিথি হিসেবে উপস্থিত থাকবেন রাজ্যপাল ইন্দ্রসেনা রেড্ডি নাল্লু। এছাড়াও উপস্থিত থাকবেন বিধানসভার মুখ্য সচেতন কল্যাণী রায়, বিধায়ক রতন চক্রবর্তী, বাংলা সংস্কৃতি বলয়ের মহাসচিব কাজী মাহাতাব সুমন। আজ আগরতলা প্রেসক্লাবে সাংবাদিক সম্মেলনে একথা জানিয়েছেন বাংলা সংস্কৃতি বলয়ের বিশ্ব কমিটির সভাপতি দেবশীষ ভট্টাচার্য। তিনি বলেন এই বসন্ত উৎসবে রাজ্যের পাঁচশো শিল্পী সাংস্কৃতিক অনুষ্ঠান পরিবেশন করবেন। বৃহৎ

পরিসরে এই বসন্ত উৎসবের নাম রাখা হয়েছে 'রং ফাগুনে বসন্ত'। উদ্দেশ্য নিজস্ব সংস্কৃতির চর্চা প্রচার ও প্রসারিত করা। এই লক্ষ্যে সংস্কৃতি বলয় চার দফা কর্মসূচি ঘোষণা করেছে। এগুলি হল আগরতলা শহরের বিয়ে বাড়িতে স্থানীয় সংস্কৃতির চর্চা, দুর্গা পূজার দশমী যাত্রায় বা কোন উৎসব অনুষ্ঠানে আমাদের সংস্কৃতিকে যুক্ত করা, স্কুল কলেজও সরস্বতী পূজাতে ও একই ভাবে এই সংস্কৃতির চর্চা, এছাড়া ক্লাবগুলিতে আমাদের সংস্কৃতির শাখা তৈরি করা। সাংবাদিক সম্মেলনে উপস্থিত ছিলেন বাংলা সংস্কৃতি বলয়ের আগরতলা সংসদের সভাপতি নির্মল কুমার দেব সহ অন্যান্যরা।

Virtual meeting-Rajib Bhattacharjee :

বিজেপি সর্বভারতীয় সভাপতি জে পি নাড্ডা এবং সর্বভারতীয় সংগঠন মহামন্ত্রী বি.এল সন্তোষের সঙ্গে আজ ভার্টুয়াল বৈঠকে অংশ গ্রহণ করেন রাজ্য সভাপতি রাজীব ভট্টাচার্য। বৈঠকে লোকসভা নির্বাচনকে সামনে রেখে সাংগঠনিক বিভিন্ন বিষয় নিয়ে আলোচনা হয়।

BJP Rally sabroom :

পূর্ব ত্রিপুরা লোকসভা কেন্দ্রের বিজেপি প্রার্থী মহারাণী কৃতি সিং দেববর্মার সমর্থনে আজ সাব্রুম শহরে এক প্রচার মিছিল ও সভা অনুষ্ঠিত হয়। সভায় বিজেপি দলের দক্ষিণ জেলা সভাপতি শংকর রায়, শান্তিপ্রিয় ভৌমিক প্রমুখ উপস্থিত ছিলেন।

Blood Donation-Sepahijala :

ত্রিপুরা ওয়ার্কিং জার্নালিস্ট অ্যাসোসিয়েশন বিশালগড় মহকুমা কমিটি ও যুব বিষয়ক ক্রীড়া দপ্তরের উদ্যোগে বিশালগড়ে আজ এক রক্তদান শিবিরের অয়োজন করা হয়। শিবিরে উপস্থিত ছিলেন জেলা যুব কল্যাণ আধিকারিক প্রসেনজিৎ ব্যানার্জি, বিশালগড় মহকুমা স্বাস্থ্য আধিকারিক ডা: জে এম দাস, ডিসিএম প্রসেনজিৎ দাস প্রমুখ।

IG Visit-South :

রাজ্য পুলিশের আইজি আইন শৃংখলা সৌমিত্র ধর আজ দক্ষিণ জেলার সাব্রুম, বাইখোড়া, বিলোনিয়া থানা পরিদর্শন করেন। লোকসভা নির্বাচন উপলক্ষ্যে সংশ্লিষ্ট এলাকাগুলিতে আইন শৃঙ্খলা রক্ষায় থানা কর্তৃপক্ষ কি কি ব্যবস্থা গ্রহণ করেছে সে সম্পর্কে তিনি অবহিত হন। শ্রী ধর জোলাইবাড়িতে পুলিশের আউট পোস্ট ও কলসী ক্যাম্প পরিদর্শন করেন।

BJP-Prochar :

আসন্ন লোকসভা নির্বাচনকে সামনে রেখে বিজেপি'র পক্ষ থেকে রাজ্যের বিভিন্ন স্থানে জনসম্পর্ক অভিযান চলছে। সমাজ কল্যাণ ও সমাজ শিক্ষা মন্ত্রী টিঙ্কু রায়, আগরতলা পুর নিগমের মেয়র দীপক মজুমদার ও বিজেপি নেত্রী পাপিয়া দত্ত আগরতলায় ও বিজেপি রাজ্য সভাপতি রাজীব ভট্টাচার্য বামুটিয়ায় আজ জনসম্পর্ক অভিযান করেন।

Northeast Games :

নাগাল্যান্ডে আয়োজিত তৃতীয় উত্তরপূর্ব গেমসে ত্রিপুরাকে প্রথম স্বর্ণপদক এনে দিলো ফাতেমা বেগম। আসরের চতুর্থ দিনে আজ মহিলাদের ২০০ মিটার দৌড়ে ফাতেমা ২৬.১৮ সেকেন্ড সময় করে প্রথম স্বর্ণপদক এনে দেন। টেবিল টেনিস ও পেনচাক সিলেটেও পদক জয় করেন ত্রিপুরার খেলোয়াড়রা। টেবিল টেনিসে শ্রেয়শী চক্রবর্তী ব্রোঞ্জ পদক পেয়েছে। পেনচাক সিলেট মার্শাল আর্ট খেলায় রাজ্যদল তিনটি ব্রোঞ্জ পদক পায়। এই ইভেন্টে ব্রোঞ্জ জয়ীরা হলেন হানতেলা কাসলেয়া ত্রিপুরা, রঞ্জিৎ রিয়াং এবং হানতেলা বুলাইয়া ত্রিপুরা। ফুটবলে গ্রুপ লীগে তৃতীয় তথা শেষ ম্যাচেও হেরে আসর থেকে বিদায় নেয় ত্রিপুরা পুরুষ ফুটবল দল। অরুণাচল প্রদেশ ৪-১ গোলে রাজ্যদলকে পরাজিত করেছে।

Belonia Senior Cricket :

বিলোনিয়া মহকুমা ক্রিকেট এসোসিয়েশন আয়োজিত সিনিয়র ডাবল লীগ কাম নক আউট ক্রিকেট টুর্নামেন্টের সপ্তম ম্যাচে ওরিয়েন্টাল ক্লাব জয়ী হয়েছে। আজ বিদ্যাপীঠ মাঠে প্রথমে ব্যাট করতে নেমে ওরিয়েন্টাল ক্লাব নির্ধারিত ৩৫ ওভারে ৯ উইকেট হারিয়ে ২৩৫ রান সংগ্রহ করে। জবাবে খেলতে নেমে ইয়ুথ ফোরাম ৩২ ওভারে সব উইকেট হারিয়ে ১৫৮ রান সংগ্রহ করে।

Women's Cricket :

টিসিএ পরিচালিত মহিলাদের আমন্ত্রণমূলক ঘরোয়া টি-২০ ক্রিকেট প্রতিযোগিতার দুটি সেমিফাইন্যাল আগামীকাল হবে। এমবিবি স্টেডিয়ামে সকালে প্রথম সেমিফাইনালে ভগিনী নিবেদিতা মহিলা সমিতি খেলবে জুটমিল কোচিং সেন্টারের বিরুদ্ধে। পরে দুপুরে একই মাঠে দ্বিতীয় সেমিফাইনালে এডি নগর প্লে সেন্টার খেলবে ব্লাডমাউথ ক্লাবের বিরুদ্ধে। আগামী ২৪ মার্চ ফাইন্যাল খেলাটি হবে।

Weather :

আগামীকাল আকাশ সাধারণত মেঘাচ্ছন্ন থাকবে। কিছু কিছু জায়গায় হালকা বৃষ্টিপাতের সম্ভাবনা রয়েছে। তাপমাত্রা সর্বোচ্চ উনত্রিশ ডিগ্রী এবং সর্বনিম্ন সতের ডিগ্রী সেলসিয়াস এর কাছাকাছি থাকবে। আজ দিনের সর্বোচ্চ তাপমাত্রা ছিল ছাব্বিশ দশমিক ছয় ডিগ্রী সেলসিয়াস এবং সর্বনিম্ন উনিশ দশমিক তিন ডিগ্রী সেলসিয়াস। আগামী চব্বিশ ঘণ্টায় রাজ্যের সব জেলায় বিক্ষিপ্তভাবে বজ্র বিদ্যুত সহ হালকা থেকে মাঝারি পর্যায়ে বৃষ্টিপাতের সতর্কতা জারি করেছে আবহাওয়া দপ্তর।
